

四庫全書

集部

欽定四庫全書

集部

幔亭集

目錄
卷一至三

詳校官中書

臣徐志晉

侍讀

臣孫球覆勘

總校官庶吉士

臣倉聖脉

校對官主簿

臣汪日贊

謄錄舉人

臣曹夢齡

欽定四庫全書

集部六

幔亭集目錄

別集類五

明

卷一

古樂府

卷二

五言古詩

卷三

七言古詩

卷四

五言聲詩

卷五

五言律詩

卷六

五言律詩

卷七

七言律詩

卷八

七言律詩

卷九

七言律詩

卷十

五言排律

卷十一

五言絕句

迴環讀
四十首

卷十二

六言絕句

卷十三

七言絕句

卷十四

七言絕句

卷十五

詩餘

臣等謹案幔亭詩集十五卷明徐燠撰燠字
惟和閩縣人萬厯戊子舉人燠負才淹蹇肆
力詩章圭臬唐人而不為決裂餽飮之習卷
首有張獻翼序稱其調匪偏長體必兼擅力
返古則盡滌時趨所以推許者甚至又謝肇
淞謂其才情聲調足以伯仲高季迪微憾古
體不及朱彞尊靜志居詩話亦謂其七言絕
原本王江寧多情至語詳閱是集固非盡出

標榜當明季詩道冗雜之時亦可謂蟬蛻穢
濁者矣閩中詩人自林鴻王蒙諸人以後即
推鄭繼之為冠炳生平喜稱繼之而卒年僅
三十九與繼之正同亦一異也集為其弟炳
所鐫炳字興公亦以淹貫見稱所撰有筆精
榕陰新檢諸書俱別著錄云乾隆四十二年
十月恭校上

總纂官_臣紀昀_臣陸錫熊_臣孫士毅

總校官臣陸費墀

欽定四庫全書

目錄

幔亭集原序

詩豈易言哉求其成一家言良不易易況備諸體稱大家乎蓋工近體者或弱於古風長七言者或短於五字即王孟二氏盛唐名家一以清婉稱近體一以風骨雄古風且各擅所長況其他乎予友徐惟和氏永寧令名父之子也授玄肖諸童烏屬草方之文考少即抵掌而談秦漢奮力以挽風騷非晉魏之音絕口不談非六籍之書屏目不視蓋病乎世之決裂以為體餽飭以為詞

故音非朱絃詞非黃絹寧棄去不屑就也弱冠嘗循例計偕登臺展驥都人欽遲朝列虛左詩歌本之古選興寄備乎開元彬彬然名家矣每停橈見過輒下榻信宿凡三眎予詩初見之已無杜德機矣再見之其善者機耶別去三易寒暑乃出暢亭集二帙予執簡嘆曰其衡氣機矣夫當其興寄於山川發憤於歲月周爰於驅馳宣情於羈旅由樂府而建五七言古由近體而至五七言絕調匪偏長體必兼善力追古則盡滌時趨可謂頭

頭是道重重發光矣又一字之工聞奇而傾耳片言之
巧覷解而躍心紙價騰湧於都門簫譜浸淫於禁掖雕
章綺合藻思羅開行且上書鳳鳴解褐鴻漸探其襟抱
將扶搖宇內豈區區搶榆所可控而笑哉閩中一時諸
子昆弟咸追述大雅取裁風人作者響臻同好景附真
足馳騁海內而惟和則獨步當時矣予歲方遲暮筆硯
都燒徒有輟翰毀草烏能述匠心之源究作者之概乎
因不愛其散帚而答其請之意長洲張獻翼序

欽定四庫全書

幔亭集卷一

明 徐燾 撰

古樂府

飛龍篇

海上三神山中為僊人居金樓高崔嵬玉堂結綺疏朝
乘飛龍去翱翔登鼎湖騁風周八極飄飄凌紫虛安期
同遨遊八公相為徒看日扶桑巔采藥崑崙區桑田有

變遷人世多榮枯安得乞靈藥蛻此凡濁軀一朝生毛羽白日昇天衢

秋風辭

秋風搖落兮草木變衰白雲繚繞兮鴻鴈聲悲蘭為佩兮芙蓉為裳彼君子兮天一方鼓桂櫂兮度橫塘明星爛兮露為霜歌聲沸兮夜未央誓與君兮永不忘人生歡會兮安可常

悲愁歌

我之生兮在深宮嗟薄命兮事遠戎烏孫老兮語不通
征塵起兮多悲風望故土兮心中忡忡羨黃鵠兮淚無窮

戰城南

戰城南死城北枯骨累累棄路側為我謂烏遊魂不歸
臭腐將焉用飼汝安足悲陰雲漠漠寒雨瀟瀟黃昏古
城下新鬼聲號咷陽九厄戰城南空裹草七尺微軀我
不惜老死蓬蒿竟何益願為忠臣忠臣誠可為茫茫穹
廬掩骼為誰

落葉哀蟬曲

西風兮吹襟蟬聲兮滿林古砌靜而葉落淒然感乎予
心憶美人於閨房兮方歛袂而沉吟

野田黃雀行

朝來步野田田中有黃雀翩翩飛且鳴飲啄亦自若何
期俠少年遽爾加矰繳置之樊籠中繫以黃金絡微物
有至性安能事束縛悲鳴念故羣所志在林薄感此宗
廟犧嘆彼華亭鶴何如辭網羅高翔在寥廓

飲馬長城窟行

飲馬長城窟水深沒馬腹朝發祈連山暮宿太原谷
男兒事格鬪安能諱殺戮昨日新戰敗死者什五六殘血
吹腥風屍骸路相續身死自不悲所痛在骨肉嗟哉杞
梁妻哀哀城下哭

銅雀妓

日暮西陵望但見蒿與萊悲風起四野歌舞有餘哀漳
河流不返總帳空塵埃荒臺久寂寞雄圖安在哉

羽林郎

昔有羽林郎持戟出未央揮鞭過酒肆招搖都市傍酒
家女二八顏色耀春芳黃金為條脫白玉為耳璫越羅
裁中裙齊紈製下裳服飾既璀璨膏沐尤馨香不意冶
遊子停驂登我堂銀鞍耀紅日韎韐何輝煌提壺索美
酒岸幘據胡床金刀膾鮮鯉烈火炮羔羊酒盡出門去
嬋媛結束腸已去復再返解贈紃羅囊君心一何苦君
情一何長婦人貴遠別持此非所當還君紃羅囊妾非

青樓倡

車遙遙

車輪何遙遙出門不顧返輪豈不能迴君心自難輓聽
此辘轳聲一聲一以遠看此兩行轍能令歡愛斷如何
馭者手不肯須臾緩敢望君心回但願車輪爛

門有車馬客行

門有車馬客來從故鄉陌乍見雖可懼道舊反不憚試
問舊親實存亡異疇昔別時諸兒童于今皆半百今時

諸壯夫多非故相識舊人居新墳新人居舊宅里社既
荒涼市朝多變易纍纍丘壠間鬱鬱生松柏離別纔幾
時光陰如此迫靜言思故鄉含情淚沾臆

白馬篇

誰家冶遊子捐軀事戎行白馬黃金羈驅馳赴朔方兜
鍪既焜燿寶劍生光芒良弓懸韎韐激矢藏縹囊仰天
射鳬雁俯身射豺狼膂力已絕世捷黠誰能當邊風方
慘冽壯士臨風僵躍馬入重圍生擒左賢王丈夫思報

國安肯思故鄉裏屍誠所願母然悲死傷

君馬黃

君馬黃臣馬赤君馬馳驅臣馬辟易君馬登天閑臣馬
伏槽檻二馬同行一馬太息

臨高臺

臨高臺望故鄉下有流水流湯湯羣草委腓萬木黃翩
翩南雁來迴翔攬衣起徬徨美人不見兮斷我衷腸

怨歌行

當時匣中銅于今翳塵土當時篋中絲于今無寸縷磨
鏡休使光縹絲休使長鏡光驚貌換絲長嫌緒亂對鏡
與治絲兩者俱腸斷

江南弄

水肌皓魄紅羅襦鬱金裙帶懸流蘇蓮舟蕩漾臨澄湖
臨澄湖連臂歌歡不來將奈何

龍笛曲

于闐玉管流哀音餘音寥亮水龍吟調繁指弱憂思深

憂思深涕汎瀾懷遠道催清顏

採蓮曲

蘭舟容與過橫塘步搖驚起雙鴛鴦羅裙帶濕生濃香
生濃香紅汗滴坐中流奏龍笛

遊女曲

羅衣半褪飄金縷約束纖腰五雜組日暮採芳臨洛浦
臨洛浦鮮明珠望交甫心踟躕

朝雲曲

朝雲日日陽臺上
曖曖迷茫開綺帳
襄王一去勞相望
勞相望夢難醒
湘水綠湘山青

鳳笙曲

纖指按節玉參差
櫻唇緩吸聲遲遲
吹儂無限心中悲
心中悲望遠情何時
吹雙鳳鳴

春日白紵曲

辛夷半落桃花開
金羈寶瑟上春臺
佳人倦倚闌干曲
兩兩黃鶯飛相逐

夏日白紵曲

綠池風來菡萏香
臨流照影見妍妝
隔花忽聽郎歌調
自取齊紈障巧笑

秋日白紵曲

庭槐初落秋氣深
月中玉腕擣清砧
東家倡婦恣行樂
酒闌更說羅衣薄

冬日白紵曲

玉肌起粟寒相侵
金壺美酒對君斟
麝蘭香氣羅衾滿

夜長轉覺氍毹煖

烏栖曲

高樓四面栽楊柳
白馬驪珂暫回首
玉壺美酒任君沽
妾身十五已當壚

微滅銀燈隔重幔
宛轉嬌聲恣啼喚
不辭今夕盡風流
只愁明日見君羞

帳中弱態含嬌嫵
一夜為雲更為雨
汝南雞啼天未明
與君還盡片時情

月銜半嶺燈將滅羅衫掩淚送君別入門獨自剔殘燈
尋思無限夜來情

塞上曲

將軍出北平匈奴爭遁走鼓振天地昏令出風雷吼邊
霜裂旌旗塞月寒刁斗繫俘受降城屯兵井陘口歸來
見至尊自獻單于首

白頭吟

貌如雨中花節似霜中柏貌改節不移別君意悽惻

解一

妾心如女蘿君情如飛絮蘿生空纏綿絮飛何處去

二解

嫁君當紅顏辭君當白首請君看鏡中雙鬢何如舊

三解

死樹難再榮死灰難再熱寄語新懽人莫遣頭如雪

四解

含悲下中堂此情空脉脉君心能再回白頭應再黑

五解

擣衣篇

皎月入房帷涼風吹衣襟遊子遠行役少婦鳴清砧良
夜既以永懷人益以深孤鴻唳天際促織吟堂陰余亦
別家久涕泣不能禁

妾薄命

南國有佳人容華世莫比
嫁與東隣兒願言結生死
良人輕別離匆匆辭故里
朝醉閭闔門暮宿長安市
新愛移平生恩情付流水
欲促遠人歸裁書寄雙鯉
遺之同心結兼以合歡被
人匪金石堅容顏何足恃
天涯君不歸河清難再俟

有所思

徙倚向花叢羅衣濕清露
烏鵲隱茂林寒蟬抱高樹
焚

香理素琴聊以抒心懷美人期不來中宵淚如注

月色滿花陰花陰空竚立何以贈所驩悲歌聊當泣
啾階蛩吟喔喔隣雞急幽會杳無期空令長太息

幔亭集卷一

欽定四庫全書

幔亭集卷二

明 徐燾 撰

五言古詩

擬古

把袂登河梁秋風慘行色去去天一涯此心長惻惻酒
榘紛錯陳哽咽不能食思君有夢魂從君無羽翼浮雲
方西馳義輪忽已匿微款俱未伸相持空太息會面未

有期功名當努力

落日不迴照顏波無西流人生處世間倏忽如蜉蝣百
年傷局促其憂乃千秋一朝時命盡悲風起松楸累累
丘土中誰辨王與侯貴亦不必喜賤亦不必憂聖賢多
微言達者盍與周斗酒相娛樂虛名安足謀

閨房何淒清思君意如搗追恨當別時光景太草草愁
歎積胸臆恍惚不能道別君未須更依然結懷抱安得
迴君車與君再傾倒

徙倚高樓上西北多浮雲浮雲望不極妾淚紛紛丈
夫思報國仗劍遠從軍十年遼水上生死不相聞

洛陽有異卉灼灼生路傍顏色如朝霞百步聞馨香五
陵多遊冶觀者如堵牆竟日歡不足秉燭飛羽觴涼秋
降白露氣序回清商嗟哉此異卉倏忽無輝光容華不
足恃歡愛靡故常因之感薄俗意緒重慘傷

感遇

山居絕塵鞅衆慮寡所營長嘯谷聲應撫琴薰風生雲

流古洞濕雨過寒潭清年光自代謝草木隨枯榮且盡
杯中酒遑圖身後名

出門盡秋色策杖登寒山雲來幽徑迷風急衣裳單林
深豺虎嗥洞古虬龍蟠路遠入煙絕日昃不得餐蒿藜
蔽田野中心自悲酸噉吁望絕巘始知行路難不如歸
林臥長嘯賦猗蘭

咏荆軻

荆卿一劍客擊筑游燕都許身太子丹生死誓不渝丈

夫報知己何惜此微軀悲歌度易水慷慨自驅車七首
中銅柱非由劍術疎報秦雖不濟千載仰雄圖

薤露

日出何杲杲薤露不長保人生在世間豈能長壽考穰
穰陌上塵離離墳畔草殤子與彭錢胡然較遲早瞻彼
薤露晞感歎傷懷抱

詠懷

歲序如轉轂一去無還期形容久不逮臨鏡始嘆悲悠

悠夢寐間覺寤何其遲處世三十年履歷多險巇世事
古猶今此意當自知奈何微脆軀與俗爭奔馳奔馳覺
生累守靜性可怡老莊有明訓役役將何為

與陳汝大鼇峰宴集

四郊散秋色層臺結夕陰孤磬出叢薄倦鳥投故林殘
霞落酒杯微月照衣襟良朋式至止臨風諧賞心既蠟
阮生屐復為梁父吟喟然發長嘯天外有餘音

振衣陟鼇頂石磴何嵬嵒松陰如車蓋亭亭山之阿深

巖逗秀色古樹垂女蘿醉來窮幽壑勃窣經危坡孤鴻
唳天際野鳥當筵歌人生寡良和不飲將如何

遊圓峰閣

古閣枕溪濱年代已湮沒山勢何嶙峋溪聲無停歇老
樹倚雲根寒泉溜山骨我來陟孤岑石徑蒼苔滑朝餐
嶺上霞夜漱波心月處處煙景移步步清興發臨風開
素襟空山坐超忽

東際亭晚眺

虛亭蒼翠間烟霞變奇景微鐘起梵音空潭自清影行
來竹靄深坐久松風靜冥然道心生
條爾塵緣屏吟眺
猶未闌殘陽在西嶺

擬登天台山

晨興理輕策捫蘿登嶢嶢荒榛隱烟霧絕巘摩穹霄泉
聲灑飛瀑山容建霞標下有百丈潭泠泠喧石橋涼燠
異巖壑雨暘變昏朝遐矚發清曠溽暑生涼飈倏倏詎
云遠羨門猶可招騁此物外觀聽彼雲中謠微風奏天

賴淡雲綴輕綃結根比華岱幽邃同中條高情豁然暢
塵襟亦已消安得遇至人與之同逍遙

春泛若耶

春風散藻景山水動微暄桂櫂泛蘭渚搖搖過前川汀
花媚幽壑岸柳垂輕湍環洲屢迴複雜樹何繽紛微波
生鏡湖疎鐘來雲門揚帆意超忽汴流情孤騫逆楫芰
荷脆隨波蘭芷繁和風駐瑤瑟落日沉金尊山川緬如
故疇昔誰能存佳境豈易覲幽懷願無諉

懷陳平夫

別子雖未久念子意何深攬衣立階除涼風吹素襟殘
鐘度微月天籟雜悲吟盈盈一水隔悠悠千里心空山
白雲滿六谿何處尋

寄題林晉伯別墅

夫子且遁世結廬居青門鳴泉瀉懸崖山光當層軒澹
澹雲影疎謾謾松聲繁林密失寒燠山深忘朝昏薄田
足禾黍幽澗多芳蓀柴門瞰清溪一徑通花源時時命

小舟去去過前村
愜此丘中賞
忘彼朝市喧
伊余秉微尚
委懷在丘園
安得相比隣
長嘯醉山樊

登鼓山大頂

曉望方巖峰
振衣涉蒼莽
樹色遠蔥蘢
練瀑空中響
峭壁插蒼穹
丹崖懸百丈
鬼斧鑿鴻濛
玄巖閔罔兩
我來叩崆峒
素心懷孤往
蘿蔓刺衣裾
烟霞隨屨杖
倚石漱清流
頓令神骨爽
薄暮日漸暝
月印蒼苔上
忽聞天籟鳴
泠泠愜心賞
願言脫塵纓
不復絳世網

贈陳价夫薦夫

明珠無連胎奇卉寡並蒂物類有如此無乃造化忌夫
何六溪中產君兄與弟意氣傾時流詞華振當世顧盼
生雄姿中原敢凌厲探討無勸勤玄心已超詣二陸久
不興芳名爾當繼

劍浦送顧世卿

行行出劍津送君還東吳未能展嫵婉別離在須臾含
涕牽君衣相視意踟躕我無雙飛翼何由與君俱君行

登青雲我尚蟠泥途相隔天一方道路阻且迂會面雖
有期祇恐容華殊悲風振原野怪鳥爭哀呼送君從此
去回首日云晡

晚渡淮水

孤帆涉淮水天氣苦寒沍積雪明長崖斜陽橫古渡漁
燈隔浦來人烟數家聚前途多風塵故山隔雲樹栖栖
問去津悠悠嘆行路遠涉猶未窮徘徊日將暮

田家雜興

春風動郊墟村村事農務桑柘陰比隣鷓鴣鳴高樹訪
舊入城稀持饁歸田暮雞犬識井間牛羊諳村路此中
寡所營悠然有真趣

憩轉華菴

精廬傍人境虛寂無垢氛食施隔林鳥衲掛前山雲池
光既澄潔香氣尤氤氲獼猴識戒律狸犬嫌腥葷談深
不顧返西嶺將斜曛終當遠城市高卧辭人羣

對月逢王元直不至

孤館寂無人寒威滿林樾天長鴈影遲露冷蛩聲歇當
尊翠靄深倚杖蒼苔滑故人期不來惆悵花間月

春日山居招袁無競

晨起倦簪沐便覺日停午梁間燕哺雛竹外鳩呼雨碧
蘚盈階除幽花映窓戶裁詩招所驩愁心繞烟樹

送鄭業師之漢陽

春風吹柳枝處處鳴鶉鳩七十四老翁猶作天涯別若
比少壯游此情倍嗚咽貧來褐不完老去頭如雪游非

尚子懷辯豈君卿
舌出門扉所甘苦
為饑寒迫湘江道
路長楚水烟波濶
茲行毋滯淫門人
望回轍

懷陳履吉久居山中

聞君居荒村寥寥
誰與侶田叟時往
還樵夫或共語吟
思倚杖時釣憶臨
流處高懷絕世氛
閒心寄烟渚此別
已徂秋涼風滿庭
樹

懷沈從先

與君未傾蓋吳門
費相尋十日不能
得嗟哉誰知音故

人不我棄題書貽空林感此歲月異傷茲年鬢侵寥寥
千古意悠悠萬里心花殘吳苑暮月落楓橋陰望君不
可見思君空自深

答葛震甫

閩海與吳門相隔幾千里君雖吳門居又隔洞庭水不
知賤子名何由入君耳雲中有片鴻江頭足雙鯉投來
皆瑇瑤報之愧蘭芷臨風懷美人感歎胡能已

慰余宗漢喪子

一官不稱意拂衣遊五湖書空羞咄咄對酒呼烏烏行
年已半百有子啼呱呱丈夫恥內顧仗劍遵長途及君
還故里歲月已云徂此兒風格異蹠躩稱家駒膝前還
復著鯉庭時能趨昨日致書來云君殞其雛知已為痛
悼坐客同嗟吁有生本非有無生亦非無達生乃賢者
西河非吾徒君今喪子後還如無子初金石有銷鑠况
此脆弱軀古人齊彭殤此意良非迂造化誠小兒無為
此拘拘

哭林遜膚先生

先人同時交什九泉下塵遺老獨有君倏然返其真君
今歸黃壚不患無所親世上少相識泉下多故人
生交有聚散死交千萬春死者足相樂生者徒悲辛

喜微師自水西歸

開士從何來云自山中歸去住無定跡有如閒雲飛隨
方皆淨土何處非禪機城市雖紅塵不染靜者衣

賦得華林暮雪

屏山何逶迤精廬依北郭日暮寒風生曠野同雲作俄
看雪片繁漸覺輝衣薄瑤華結珠旂玉屑飄金鐸跣趺
雙樹林疑是天花落

望月有懷唐宗貞陳彥宗

微月入庭除疎松散清影山深嵐翠濃露落衣裳冷當
時月下人蹤跡同萍梗對月思所驩此情空耿耿

劍浦送康元龍遊吳

余自吳門歸君望吳門去來往本無期延津忽相遇一

望故山雲一問他鄉路語罷各分離
愁心滿烟渚

聽陳振狂彈琴因懷劉道子

夜坐松桂叢孤琴理殘月流泉澄幽陰
微風助清越
愁因寄指深興以餘音發悠然山水心
懷人向天末

南嶼田家

綠水蔭柴門蒼山遶茅屋老樹鳴春鳩
顏垣眠小犢鷺鴨自成羣兒童戲相逐
游從里社歸稅藉農桑出榮辱非所知
飽煖願已足義皇世代遐此地傳遺俗

空山布穀鳴春風散墟落夫妻同荷鋤南畝事東作衡
門隱者居斗酒田家樂閒惟念子孫老不知城郭安能
受一廬鼓腹同耕鑿

宿雲窩贈林熙吉

吾黨有一士結茅峴山麓庭前羅異卉屋後繞脩竹託
跡在巖丘結交盡麋鹿水石同弟昆農桑課童僕時為
梁父吟閒取離騷讀服食慣參苓往來狎綺角能忘朝
市喧不與世情逐誰知錦水濱却有愚公谷樸被時一

來同抱孤雲宿

懷陳惟秦

相思一何深相別一何久
條風吹靡蕪新火鑽榆柳
春光漸以闌莫負尊中酒

題王玉生山水

輞川迹已陳千載寡奇筆
王生嗣其微少負山水癖
寸穎幻烟霞尺素生泉石
古木陰溪湄虛亭倚山隙
一徑轉危岡兩岸分泉脉
澹澹柘林黃蕭蕭楓樹赤
巖壑互

向背雲陰變朝夕人境信有之願言卜丘宅

猛虎行

上山采薜蘿下山采薜蘿采采猶未已白日將崦嵫歸
來逢猛虎咆哮當路隅徬徨何所之林莽多人居豈無
桑間人輕薄同秋胡此身雖可噬此節安可渝甘心飼
猛虎矢志同羅敷

寄林去疾

相聞十餘載相隔三百里君瞻鰲頂雲我夢鯉湖水何

以贈所懽因風寄蘭芷

酬陳汝大

曰余少翫髀寢跡山澤間世路罕所營翰墨聊為驪結
交二三子氣味芬若蘭道誼互相砥文章時往還所嗟
非比隣別易會良難君其勗諸子令名當自完繼之既
以逝大雅聲云殘吾黨嗣遺音矢志迴狂瀾旗鼓漸以
振逸軌尚可攀景光幸自愛勉旃毋多譚

寄李惟實

嶺南多畸人李君稱倣儻神鋒既俊逸胸懷尤爽朗弱冠奮青雲聲華滿天壤詩宗大厯前文軼班揚上足跡半四方遊道漸以廣傾蓋在都門投分慰心賞敝帚安足珍乃獲千金享易水賦離歌中心發悲愴歸臥空山中猶作真人想

貽陳汝翔

柯嶼山水奇之子鍾靈秘吾黨推白眉詞壇標赤幟衡門可棲遲丘園還自責服食米三秀衣裳裁薜荔天倪

既已和純白無不備但作欄衡狂不下楊朱淚睽違日
以長臨風思把臂

酬陳伯孺春日見訪之作

予寧不得意幽居嗟陸沉穉子門外呼有客來相尋論
心意已愜握手情何深新詩餘萬言居然正始音談深
梅雨歇坐久春鳩吟日暮別我去悵然勞此心

五君詠

陳汝大

汝大長者流涉世嗟不偶玄北有精詣黃庭能自守混
迹居泥途飄然出塵垢作賦餘萬言讀書窮二酉振響
主詞盟伊余忝其後非博生前名所志在不朽

陳汝翔

汝翔好奇古遯跡在柯嶼詞藻何離離才情尤楚楚能
追正始音不作齊梁語臭味既已同素心自相許睽乖
勞我思山中正延佇

陳平夫

平夫貌不揚意氣何卓犖恥抱齊門竿甘作荆山璞詩
解匡生頗談折充宗角一飲動百巡賢聖分清濁古道
信寡諧正音久遼邈努力崇令名典籍有先覺

陳伯孺

伯孺秉異姿弱冠富經籍拓落守太玄異同辨堅白作
賦已馳名耽竒自成癖丹青發妙賞磊磊生泉石把臂
結詞盟微悰永無斁

陳幼孺

薦夫意氣豪逢人作白眼冥心契道詮矢志稽墳典伯仲既齊名君才良不忝大雅久沉淪俯仰知音鮮凌厲向詞壇片語人矜善結志在千秋令名爾當勉

赴京道中寄惟起惟揚二弟

我行值炎暑倏忽還徂秋眷言念同氣惄然生百憂馳暉不可駐逝水無停流感茲歲月駛悵以道路脩悲端起中夜夢寐居林丘

林丘渺何許遠在鰲峰麓叅差多巘巘蒙籠匝花竹遺

踪追考槃高吟動淇澳一落塵網中與世相徵逐俯仰
思故園悽風滿愁目

愁目不可極悵望之魂驚仆離足感嘆況乎骨肉情愁
多無定緒路遠難計程危時幽憤積逆旅孱軀輕涼風
天際來嘒嘒哀鴻鳴

鴻鳴一何哀客心一何苦昨發潑溪濱今宿桐江潁平
沙翻驚飈崩崖蕩零雨中宵蚊蚋喧白晝馮夷舞嗟哉
行路難含悲望鄉土

赴京酬陳汝大見送之作

義輪轉南陸天氣何鬱蒸駕言出江汜婉孌辭良朋握手長太息涕下同沾膺伊余下乘資致遠胡能勝臨觴發麗藻要我以飛騰匪惟繾綣篤徒令感歎增小石無完璞勺水無堅冰既愧明德茂敢期勲業弘三復君子言旦夕懷冰兢芳規在往哲努力將憑陵

答袁無競

乍別已不懽久別情轉惡淒淒零雨濛鬱鬱炎蒸爍遵

途憂風波對境懷丘壑濡毫無妙理把酒強為樂遐心
寄蘭荃秋陰生杜若緬懷揮袂初風景宛如昨遠道佇
徽音高標憶河朔

苕溪送元直南還

送客情已悲何當更送汝送汝情已悲何當在逆旅此
情各自知臨行復何語握手立斯須相看淚如雨

長安書懷孟郊體

燭滅方知黑其明同瞽師脉絕方知死安得稱良醫文

章屢棄置猶有俗所嗤彈射豈不精所惜覺悟遲得失
論工拙勝負分雄雌世無鮑叔牙此意誰能知家山八
千里策馬燕風悲中情徒鬱結冷淚空雙垂

喪車行

歲序當杪冬雞鳴聞巷哭填衢廣柳車載道殘魂木哀
哀薤露聲炯炯方相目骨肉有餘悲親朋寡顰蹙當其
在世時營營苦不足百年同隙駒一夢同蕉鹿靈爽歸
山丘枯髀別華屋城郭不相容棄之邛山麓

初夏邀黃仲高孝廉張孺愿太學錢叔達山人

張公魯徐仲和秀才及社中諸子集澄瀾閣

良辰集羣彥，暫謝區中緣。
駕言出西郭，飛觴湖水漙。
澄瀾敞高閣，峰陰流綺筵。
丹嶂互隱伏，粉堞相迴旋。
依岼垂柳密，出水新荷圓。
珍禽響叢薄，錦鱗沉深淵。
芳思結瑤草，清音鳴朱絃。
願以桂楫汎，同將蘭茝褰。
風和嵐翠煥，日落暮景延。
幽賞既已愜，旅懷由茲宣。
白駒聊可繫，奉君終歲年。

送黃明立北上

路遠無倦蹄天長無倦翼千里始停御九萬方一息未
騁康莊途終當受銜勒未能搏扶搖安得惜羽翮之子
腰褭姿兼負鷗鵬力行將垂青雲非久困槽櫪一去登
天閑且向南冥適飛騰自有期臨岐免悽惻

下第述懷

匠石屢不顧定匪明堂材淵客屢不採定匪明月胎十
年三棄置中情空自哀傷哉吾道非豈乏干時媒歎彼

行役苦畏茲年鬢催進退兩躑躅坐立空徘徊升斗豈
吾志結念居南陔

遊鉛山觀音洞

高秋出郭門名區訪靈鷲徑路既逶迤林巒錯如繡怪
石競瑰琦奇峰自輻輳玲瓏似雕鏤砢砢欲爭鬪倚伏
形體殊剝蝕膚理皴中有大士巖丹梯轉深竇竅從混
沌開屋以穹窿覆諸厓地脉藏一隙天光漏巍巍逼蒼
旻陰陰失清晝澄泓崑崙停琮琤石齒溜寧云蓬島遙

應笑華陽陋造化播神奇此理胡能叩低迴及崦嵫嵐
翠生懷袖

桑溪禊飲詩二首

春風載柔遵彼長林我有旨酒與子同斟幽懷既愜玄
想彌深悠悠逝波實愴我心

暮春有餘閒出郊騁遊目桑溪激清湍澄泓遞洄洑微
暄起川渚輕陰垂灌木羣賢互箕踞浮觴沂溪曲週遭
信隄岸斟酌勞童僕石轟防仄傾流駛慮顛覆幽賞豁

塵襟餘癖散春服尊壘猶未罄義輪欲迴轂俯仰成古今動靜悟往復誰哉契我心蘭亭有高躅

題陳伯孺畫

羣山既葱蘢諸溪何蜿蜒孤亭倚高岡人家陰喬木蒼松盤路歧危橋度空谷地僻無冬春山深絕寒燠乘閒問友生策蹇勞童僕步步出烟雲悠悠入花竹潺湲滿清聽空翠生巾服閒身寄林丘野性諧麋鹿瞻彼城市中風塵空碌碌

慢亭集卷二

欽定四庫全書

幔亭集卷三

明 徐燾 撰

七言古詩

帝京篇

文皇定鼎都燕薊三輔黃圖誇壯麗九重宮闕何嵯峨
百二山河咸拱衛五鳳高樓逼太清六龍御宇泰階平
曠曠曉日升金闕縹緲紅雲擁玉京玉京金闕倚天開

隱隱鑾輿複道來，雲迷翠幃依龍衮。
露滴金莖泛羽杯，平明長樂鐘聲響。
九天日月開僊仗，少史臺中曉聽鳥。
虎賁階下朝鞭象，月照彤墀環珮齊。
風生青瑣旌旗颺，高臺突兀比章華。
上苑紆迴同博望，我家京洛何煌煌。
山河錦繡軼隋唐，斷髮文身俱稽顙。
雕題黑齒盡梯航，三載公車計偕吏。
嚴樂鄒枚乘傳至，黃紙承恩金馬門。
綠衣錫宴慈恩寺，勅賜當街上五花。
金鞭絡繹更堪誇，市中春色濃如錦。
身上宮袍爛似霞，粧臺舞榭層雲裏。

粉白蛾黃兼皓齒，怙寵翻令女伴憎。承歡却得天顏喜，更有中涓美少年。朱顏白皙珥貂蟬，當筵解唱霓裳曲。出直常揮碧玉鞭，一代豪華稱戚里。回天轉日誰能比，薄暮酣歌閭闔門。平明取醉新豐市，繁華三五上元燈。蜀錦吳綾結作棚，任從玉漏催銀燭。不顧銀河轉玉繩，馬上佳人金絡索。筵前公子玉壺冰，懸得華燈燈七寶。構成綺閣閣千層，中宵露冷羅衣濕。嬌童兩兩當筵立，夜永寧愁鳳腦殘。寵移豈顧龍陽泣，侯家繡柱玉盤龍。

朝朝鼎食奏歌鐘翠翹金鳳三千隊畫閣雕闌十二重
繡枕春宵開菡萏羅幃夜月絢芙蓉五侯七貴豪華客
油壁香車過柳陌花前調笑片時春百萬黃金輕一擲
春風日日恣遨遊北里南隣樂未休玉顏到處堪迴轍
珠箔誰家不上鉤青錢多買醉紅袖暗藏闔投來青玉
案費盡錦纏頭踰躡紅袖人如玉豔舞嬌歌歡不足琥
珀深杯醉玉樓珊瑚寶樹羅金谷灼灼桃花兩頰紅娟
娟柳葉雙眉綠愁紫弱水遠重重夢繞巫山高六六王

孫公子好遊間往來射獵向西山驅將鷹犬垂鞭去射
得狂狸帶箭還九衢三市相迤邐車塵白日連天起六
郡良家盡錦衣四方賈客多紉綺錦衣紉綺競豪奢結
俠追歡意氣賒論交半是蕭朱輩托命多於趙李家華
堂宴會春風繞一派弦歌聲嫋嫋香氣頻聞寶鴨薰漏
聲忘却銅龍曉春來春去自年年聽盡笙歌與管絃但
知芳草春風滿誰識鶯花歲序遷自古奢華豈能久轉
眼紅顏成白首往日堂前羅異花于今門外生衰柳世

事悠悠未可知桑田滄海須臾期金張許史今何處富
貴驕奢空爾為

聽鶯曲

條風淡蕩春將半倚欄忽聽鶯聲亂隔竹綿蠻別樣啼
遶林睨睨相呼喚相喚相呼不住聲聲聲偏動冶遊情
王孫載酒青樓醉美女尋芳紫陌行青樓紫陌春風徧
一種嬌聲千萬變彷彿秦箏出谷聞依稀羌笛隨風轉
秦箏羌笛韻悠揚幾處歡娛幾斷腸閨中少婦悲征戍

路上行人憶故鄉故鄉渺何許鶯聲何太苦征戍隔遼
陽聞鶯空自傷鶯來鶯去自年年聽此啼聲倍可憐百
年愁鬢聲中改九十春光舌上遷莫嘆韶華如轉轂愛
鶯且賦聽鶯曲但得長聞柳外聲何辭頻進杯中醪

送遠曲

津亭下葉紛如雨客子遠游何處所悠悠一別無還期
相對悲啼不能語此去山中經幾萬勸君惟有加餐飯
須臾分手各東西猶聽前林征馬嘶

別離曲

絲韁白馬黃金勒僕御門前苦促逼叮嚀握手暫躊躇
欲住須臾竟不得心知此別無還期猶問君歸是幾時
心知此別書難寄猶問征鴻何日至為君整轡君上鞍
頻頻勒馬回頭看無情馬足如飛電路轉橋回君不見
歸來妝閣雙淚垂此身誤嫁遊俠兒

寄衣曲

流黃機上鴛鴦錦明滅疎燈照孤枕空閨冷月自娟娟

絕塞金風何凜凜起視明河漏已殘沙場遙望路漫漫
羅幃錦帳人何在毳幙氍毹地更寒手剔殘燈取刀尺
製得征衣寄征客去年寄去無回音此日無由識寬窄
寬窄如今未可知幾回欲剪又遲疑金刀未下腸先斷
弱線初縫淚自垂淚垂點點俱成血污在征衣不能減
殷勤為拭衣上痕恐令孤客添愁絕掩淚裁衣遠寄將
妾身不及此衣裳衣裳猶得親君體賤妾空居天一方

汲井曲

銀床斜壓梧桐井，牽動殘絲五色綆。
臂捲羅綃寶釧高，波凝玉乳金瓶冷。
沈沈鴨綠浸鴉黃，轆轤一聲愁斷腸。
碎光搖動闌干濕，草根滴露陰蛩泣。

秋夜曲

畫幕含春度清吹，高燒絳蠟金盤膩。
銅龍滴露夜聲沈，老兔崩雲秋影墜。
銀箏斷續檀槽語，紫霧迷濛罩金縷。
蟬衫麟帶委羅屏，枕花濕透巫峰雨。
牽絲曉井啼烏急，寒蜩叩月香蘭泣。
紅光漸射菱花臺，又拂嬌蛾寫春碧。

老將行

老夫元是良家子少年流落戎行裏能將一劍淨烟塵
幾入重圍身不死纍纍金印肘間懸塞上馳驅五十年
已羨功勲載盟府久看姓字書燕然一朝謝病歸巖壑
門外蕭條可羅雀身經百戰未龍鍾猶向人前誇矍鑠
寶劍年多鋒鏑銷樞中老驥鳴蕭蕭戎衣掛壁成塵土
舊日紅旗顏色凋一自投閒經幾載請纓壯志還應在
遙望沙場願裹屍猶思銅柱標炎海鋒鏑今年去備邊

連營烽火通甘泉多少材官俱束手無人賈勇能登先
將軍聞此氣勃勃目眦盡冠衝髮便往投書獻至尊
雄心誓欲探虎窟據鞍顧盼出轅門垂老還堪報主恩
但令此去清沙漠不管金鎗臂上痕

北邙行

洛陽城外邙山麓舊鬼哀呼新鬼哭黃昏髑髏作人語
白晝烏鳶攫人肉新墳古塚爭嵯峨世間人少北邙多
北邙山中松柏樹聽盡車前薤露歌人生處世多辛苦

賢愚貴賤同抔土不如歸去學還丹丹成白日生羽翰

結交行

酌君金兕觥聽我結交行今人結交只結面三杯濁酒
傾生平酒酣拔劍多意氣死生患難毋相棄出門酒醒
各東西此情便已生同異結交難重可悲人情反覆誰
能知笑談各已藏矛戟對面真如隔九疑君不見陳餘
與張耳當年刎頸徒爲爾又不見鮑叔與夷吾千載相
知能有幾仇隙多生謔浪間睚眦起在刀錐裏翟公賓

客竟如何一旦門前張雀羅田文座上客常滿一朝失
勢皆分散結交行難重陳世途處處皆荆榛今朝相對
且飲酒明日悠悠行路人

猛虎行

樵採當荒郊林臯猛虎聲咆哮欲往避之日在崦嵫曠
野啼鴟鴞四顧徬徨而股栗猛虎張頤展爪撲人食余
告虎吁嗟麟兮不食生物踐生草爾虎白額斑狸而黑
文貌豈不如麟胡為不仁而撲我猛虎前致詞我虎居

深村飢來啗牛羊牛羊啗不足方思啗人肉人居城市
與人伍撲食同類何可數誰言虎猛能啞人世人之猛
過於虎

俠客行

兩人市中相耳語欲報深讐誰敢去壯士聞之氣鬱陶
平生俠烈同荆高髮上指冠淚如雨借問君讐在何許
一劍朝辭都市傍素車直指邯鄲路刺殺讐人函首歸
爭看頸血猶沾衣主人欲奉千金報問以姓名終不告

辭君躍馬出都門君但報雙言母報恩

去婦詞

紅妝洗盡顏憔悴一片愁心幾行淚良人重色輕別離
舊日恩情頓相棄含悲含怨出深閨宛轉躊躇更慘悽
枝頭萋萋分連理枕上鴛鴦散並棲鴛鴦萋萋歸何處
十載綢繆今別去往事翻同墜井瓶餘生却類飄風絮
憶昔當年初嫁君明璫翠袖紅羅裙帳開綺閣連宵月
夢遶巫山一段雲荏苒光陰如轉轂人情日久多翻覆

薄命從來怨玉顏
嬌姿一旦辭金屋
萬轉千迴不下堂
悲啼那忍別姑娘
君恩似水終難返
妾意如膠詎敢忘
心知別去難重見
手把君衣苦留戀
此生無計入君家
芳魂願化孤飛燕

築城詞

丁夫抱杵城頭築
朱顏少婦城邊哭
哭聲未絕城已崩
無數丁夫遭殺戮
殺戮丁夫就此埋
半為黃土半人骸
長城未畢山東亂
四海紛紛歸楚漢
吁嗟呂政胡為乎

亡秦乃在廢扶蘇

古戰場

漢家將軍猛如虎
手執長戈腰大斧
白首從征恨數奇
可憐性命輕如羽
鼓聲死兮弓絕弦
狼奔鼠竄無行伍
良家百萬試鋒鏑
枯骨如山委黃土
燐火星星點白楊
黃雲漠漠依邊樹
千載猶聞戰血腥
夜深不禁啼猿苦
魑魅山魈當路號
哀聲長亂黃昏雨
遊魂難返玉門關
怨魄年年成杜宇

古別離

君身如車輪去去無迴轍
妾淚如井泉涓涓滴不竭
歡愛能幾時傷哉此離別
蕭蕭征馬向人嘶欲別未
別心慘悽深閨不識天涯
路但向門前看馬蹄送君
試折長隄柳立馬躊躇豈
能久明年柳發今年枝還
記今年送別時

征婦怨

今年賊陷臨洮府殺死官軍何可數
征夫塞外骨成山

少婦閨中淚如雨死生消息總難知欲往招魂又自疑
機中幾度聞嘶馬又恐夫歸投杼下

廢居歌

東隣敗屋西隣鎖殘柳蕭蕭燃鬼火昔日繁華今日衰
空堂白晝居狐狸子孫流落不知處歲久荒涼誰敢住
井涸池枯竈絕烟寒螢四壁啼秋雨當時宅中歌舞人
于今已化北邙塵

古怨

當時初嫁君貌比楊花好今日與君離貌比楊花老楊
衰能再榮妾貌終枯槁君如記妾舊容華但看明年楊
白花

綠珠詩

盤龍洞口雙蛾翠玉唾流香脂粉膩三斛明珠艷質歸
千重錦障秋波媚玉笛聲寒響斷雲鳳釵蛟佩舞明君
光生鳳蠟春厨煖香屑龍鑪夜閣熏曲曲鶯喉歌懊惱
紅顏不向青銅老寶砌苔痕蝕百花名園梓澤生秋草

一死難酬衛尉恩，鬢雲斜墜玉鈎翻。
碧莎黃土碎香骨，朱樓白日啼妖魂。
澗中金水流鳴咽，半寸珊瑚千點血。
麝氣春凝柳絮風，珮聲夜泣梨花月。

代閨人答輕薄少年

妾本燕趙姿，委身事君子。憶昔深閨私語時，指天誓日同生死。
一朝執戟赴長安，彼此恩情隔萬山。經年去住無消息，何處留連不肯還。
聞君日日耽游冶，蹴鞠鬪雞魚走馬。醉裏常拋金彈丸，狂來碎却珊瑚把。
自矜豪俊

又繁華百萬黃金散狹邪
昨宵趙女顏如玉今日燕姬
色似花如花似玉爭歌舞
歡娛豈識淒涼苦樓上朝朝
望白雲枕邊夜夜啼紅雨
流年青鬢嘆蹉跎冷落深閨
可奈何捲簾忽聽鶯聲老
又是春光一度過

王震甫以王叔明山水見貽答謝

王生嗜古元成癖古今圖畫如山積
壁上時時烟霧飛
案頭隱隱生泉石吾聞勝國有王蒙
丹青綽有巨然風
幽溪細路已盤曲烟嵐樹木何菁蔥
此圖珍秘幾年所

廉者不求貪不與知余夙有卧遊情一旦披圖便相許
奚奴捧送神飛翻山齋賞鑒忘朝餐焚香再拜謝君賜
照乘明珠未是恩

題寶月樓空江秋笛二卷後

余偶得前輩陳伯煒鄭孟宣家藏二卷皆洪永中
海內名公之筆剝落者過半矣然殘金斷壁自足
為寶乃合裝一卷而作此歌

襲下有焦桐柯亭有枯竹何期得遇蔡中郎一取為琴

一為笛中郎已死知音稀每有奇物誰能知汨沒泥沙
棄水火令人往往心傷悲國初至今二百載其人與骨
今安在二圖淪落在人間墨跡依稀猶未改吾鄉陳伯
煒鄭浮丘兩人前輩稱風流坐賓樓上三更月吹笛空
江萬籟秋名公詩句題應偏畫圖瀟洒尤堪羨恍若笛
聲江上聞尚疑月色樓頭見當年棄置廢簾中蠹魚蝕
盡塵埃蒙余偶得之發大叫心顏怡悅開雙瞳吁嗟乎
奇物顯晦自有數豈但柯亭之竹嶧山桐

贈歌者

習家池上春晝長
主人愛客飛羽觴
梨園子弟紛成行
少年白皙稱陳郎
何晏之粉荀令香
技掩秦青音遶梁
翩翩廣袖能迴翔
脩眉高髻內家粧
月中一曲舞霓裳
輕敲檀板按宮商
頓令四座生輝光
蘇州刺史空斷腸
奈何與子非一鄉
安得相從樂未央
人生及時須徜徉
莫令兩鬢生秋霜

題王崑仲畫障

寒流瀾瀾瀉石壁嚴霜剝樹枯幹瘠鬼斧劖石江許蹲
怒蛟吹水奔濤逆鼉鼉狐魅晝攫人叢林灌木無行跡
我覽生綃毛骨寒披索枯腸動吟魄

采真篇送林叔度遊鴈宕

壺山烟客持玄錄凌辰御氣僊山麓星冠七葉芙蓉顏
螭衣霞佩仙家服辭家將作采真遊鴈宕山中訪靈族
踏斷遙空一線虹歷徧洞天三十六雲為御兮風為車
駕青虬兮叅白鹿蓬瀛弱水豈微茫圓嶠方壺堪借宿

祇從縣圃饌瑤芝不向人間希辟穀知君名姓注仙班
聊贈雲璈歌一曲

送柯秀才還莆

逢君何太遲別君何太早朝發越王城暮指壺公道壺
公山色凌青天雲霧蒼茫暗玉鞭匣裏祇存馮子鋏杖
頭猶挂阮生錢餘錢歸去堪沽酒醉後新詩三百首賦
才元不讓三都何恤紛紛譏覆瓿人生知己古稱稀此
去何人薦陸機秋風已就圖南翮看汝扶搖天際飛

述遊篇

去年仲冬束行李掩淚辭親赴燕市今年五月將中旬
方能稅駕歸田里中間辛苦難具陳萬里風波愁殺人
從來痛定纔思痛回看往事徒沾巾閩溪山水何太惡
水似瞿塘山劍閣仙霞嶺上氣不平黯淡灘頭膽將落
浙中水淺易膠舟蒼頭牽纜如偃僂一日才行十數里
舡前兀坐空百憂歲除才到雲陽下縣官正閉奔牛壩
停舟三日不得行關吏相逢便相咤揚子長江天際流

江豚吹浪神鬣浮長年挾舵神色喪可憐身世同輕漚
黃河之水名九曲由來舟楫愁傾覆石尤風急水奔騰
隔江少婦將兒哭北方景物更荒涼滿目黃沙古戰場
瘦馬驅馳髀肉損酸風射眸肢體僵馳馬衝寒過涿鹿
四郊倏忽飛滕六千山萬徑少人行暮抵良鄉無處宿
長安上策不見收百金用盡存貂裘難從北闕操齊瑟
猶戴南冠學楚囚男兒致身苦不早驅車復出長安道
風景蕭條倍去時塵土侵人顏易老三吳兩浙競繁華

此際令人轉憶家
歸家幼子牽衣泣
鬢衰面黑咸咨嗟
奔走天涯過半載
歲月無情不相待
人生得志在丘園
何必飄零寄湖海
行路難空悲酸世
情反覆同波瀾有
璞莫向王庭獻有
缺莫向侯門彈笑
殺劉蕡空不第且
將高臥學袁安

石溪歌贈林隱君

南劍有溪名君竹
脩竹蒼蒼溪水綠
中有幽人號石溪
誅茅壘石溪之曲
溪流日夜聲潺潺
幽人嘯傲石溪間

石可枕兮溪可漱富貴浮雲眞等閒幽人今年八十幾
足跡何嘗到城市白岩嘯月遇崆峒青嶂眠雲夢黃綺
憐余本是武陵人欲向溪頭一問津桃花好逐溪流出
世上如今不是秦

瞻鳳歌為張叔弢賦

叔弢父號鳳山鳳山者長溪之山也嘗繪圖以當
臥遊及父卒而圖亦失去者二十載叔弢後復得
之攜入燕吳楚越間求名公長者紀其事以致追

輓之意濫及小子炯炯不敢辭也為作瞻鳳歌

長溪山水奇鳳山幻靈境重岡疊嶂自迴環萬壑千巘
相掩映中有畸人號鳳山時時長嘯此山間彩雲明滅
元堪覩梧竹蕭森更可攀一朝跨鳳歸仙府丹崖翠壁
空塵土遼鶴千年去不歸慈烏夜半啼聲苦篋裏惟存
一畫圖忽然飛去胡為乎延津無處重尋劍合浦何期
更得珠帝憫諸孤懷怨慕五丁曾遣相呵護神物由來
不久湮珠還劍合仍相遇張生得此喜還悲陟岵興歌

淚滿頤幾迴欲擬招魂賦到處曾求薤露詩此物遺亡
二十載迄今精爽還應在千仞猶疑覽德輝九苞彷彿
增文采諸子山中日夜號鳳山依舊倚天高不須人世
悲麟喪還羨君家有鳳毛

王生行

王生少負耽奇癖落魄風塵人不識祇從湖海恣遨遊
羞向人前嗟厄塞胸中神識一何奇儒雅風流應在茲
篆隸由來追史籀時時復作無聲詩城西一室大如斗

室中奇物無不有花鳥圖書可自娛樽罍彞鼎傳來久
賞鑒能同張茂先翩翩意氣更堪憐胡琴劈碎寧論價
古劍酬人不計錢與余傾蓋稱莫逆問奇肯過揚雄宅
竹裏酣歌任往來花間嘯傲忘朝夕朝夕相從酒一樽
交情如此君毋諉但能博物復飲酒世事悠悠安足論
赤巖吟為大田令謝君賦

劍潭之東多石壁四面巉岼如火赤開闢至今千萬年
巖前翁鬱皆蓬蒿上有嵯峨萬仞之丹梯下有潺湲千

頃波流碧山魑罔兩盤其中虎豹豺狼據為宅任是樵
蘇日往來豈識岩中有奇蹟岩中奇蹟人不知可憐空
使山靈悲誰能鑿破混沌竅攀蘿附葛相追隨謝君本
是探奇客年少鳴琴宰巖邑每學盧敖汗漫遊登臨折
盡東山屐披蓊燃炬入岩中猛獸山妖都辟易萬年靈
秘一朝開懸岩絕壁何奇哉一聲長嘯翠微頂頓使延
平潭裏白日生風雷搆將臺榭連雲起浮屠屹立層霄
裏獨向岩前望九垓百二關河如黑子吾聞神州三十

六洞天此赤巖兮胡為乎不傳徐生披圖學宗生案頭
隱隱生雲烟願得偕君一葦過劍浦題詩刻石岩之巔
岩巔墨蹟永不毀鄒嶧之碑廼可擬吁嗟乎山川顯晦
自有時世間何物無知己

賦得易水寒送人遊燕

燕山嵯峨易水流北風吹水聲颼颼荆卿驅車不顧返
仗劍欲報燕丹讐可憐燕恥猶未雪壯士衷腸空激烈
千年往事水猶寒蕭蕭壯髮能衝冠憐君故是荆卿比

翩翩俠氣橫燕市擊筑還過易水濱一聲長嘯悲風起
過鄧汝高別墅

一區別墅東山曲幾片青山隱茅屋門前垂柳覆清溪
屋後長松亞脩竹寂寂衡門無俗喧主人留客烹雞豚
衣冠朴素禮真率依稀如入桃花源彈棋擊劍復飲酒
世上浮名竟何有君今蹤跡已青雲我也棲遲甘白首
與君相對歡且悲人生會合能幾時恐君作吏風塵去
此地開尊更有誰

寄閔壽卿山人

去歲逢君浮玉山江風颯颯吹離顏
今歲重過揚子渡烟波咫尺難相遇
鐵甕城頭一喚君江聲洶湧那能聞
寸心強對南徐月雙眼徒瞻北固雲
此生應嘆交歡淺日日思君長展轉
幾回飛夢到君傍江水茫茫空斷腸
破鏡行為陳大賦

美人有寶鏡價值千黃金曾與郎君同照影
又與郎君同照心一朝分散如萍梗此心雖同
不見影金刀剖處

鸞鳳分十年蹤跡不相聞可憐兩人持一片此生何處
重相見勸君對此休自悲神物會合終有時

冬夜同汝翔振狂在杭集汝大山齋

玉衡指東露華冷朔飈暗度梧桐井張縠亂謔開雙頤
銅龍咽漏宵將丙僕御執炙兼進庖筋力跛倚神俱疲
客眸耿耿若巖電搜腸嘔肝斷鬚髭五人同騁談天口
隅墉魑魅踉蹌走揮手出門天宇昏沿衢木柵懸燈守
嚴霜砭肌心惻悽轆轤聲斷金井西解衣匍匐登牀睡

四隣咿喔啼天雞

贈胡外史

錢塘風景真奇絕，吳山蒼翠湖光白。
山川靈秀萃何人，之子飄然自高格。
生來蹤跡壓塵埃，湖海狂遊亦壯哉。
振衣頻陟雲龍頂，仗劍曾登戲馬臺。
燕秦楚越行皆徧，又泛扁舟過海甸。
九鯉湖邊信短筇，武夷山上開華宴。
遊興年來尚未央，溫陵劍水復清漳。
三秋石鼓簪黃菊，五月楓亭摘荔香。
羨君懷抱何瀟灑，知君不是悠悠者。

世路由來遇合難風塵莫怨知音寡伊余癖性好遨遊
與子交驩幾度秋春風竹外頻來往夜月花間遞唱酬
唱酬來往情偏好漫把交情同草草囊裏無錢休嘆嗟
尊中有酒須傾倒胡生胡生何太奇余每談詩君解頤
自堪意氣稱吾黨不但前身是畫師

贈王少文

王生今年纔十幾籍籍香名滿人耳已詫文章瀉大河
更誇神骨澄秋水目下三行腹五車志如鴻鵠書龍蛇

遨遊竟日車多果爛漫千言筆有花羨子襟懷何卓犖
羨子高談何嶽嶽五色爭看鸞鷟文片言能折充宗角
日來相見即相歡同心臭味如金蘭高才豈復論長吉
年少還應陋子安莫笑相逢頻倒屣如此寧馨誰可擬
堪嘆茫茫宇宙間眼中之人惟有爾

九日懷惟起弟客吳

去年九月客吳門憶汝淒涼欲斷魂今年汝作吳門客
一望關河千里隔我家兄弟大參商歲歲年年俱異鄉

夢迴閩海風塵遠目極吳門匹練長
秋風颯颯秋光老
登高望遠傷懷抱天涯遊子滯還期
籬下黃花為誰好

蜀道難送王震甫之臨邛省刺史兄

蜀道本是蠶叢域古來元不通中國
秦帝金牛計太奇
五丁費盡開山力鬼斧神功山為開
懸崖絕壁真奇哉
灩澦瞿塘水勢猛波流日夜聲喧
阇中有畏途稱劍閣
羊腸鳥道山形惡天梯石棧度偏難
鬼見為愁蛇為却
猿狖呼羣接臂行山魃野魅作人聲
愁雲慘淡日無色

行人此際難為情蜀道之難已如此臨邛險惡尤無比
風俗由來似吐番州城半遶平羌水君家伯氏賢大夫
五馬蹀躞專城居幾度經過九折阪寧為叱馭無迴車
閩蜀山川何隔越尋兄萬里堪愁絕七首長飛象耳雲
馬頭幾看峨眉月于今西北正烽烟羌笛胡笳聽慘然
中宵起坐腸空斷客路思家淚欲連蜀道之難應莫歎
長途惟有加餐飯鵲鵲原上正相思勸君休起鄉關恨

送陳明府應召之京

冶城八月秋風起仙吏驅車入帝里白叟黃童擁道周
攀轅臥轍情無已一官閩海幾年餘漢室循良更孰如
魯恭政簡能馴雉羊續官清不愛魚聲名久已聞天子
璽書召對明光裏滿縣穠桃爛似霞半肩行李清於水
新秋乘傳到長安五色花驄豸冠幾多狐鼠爭投竄
當道豺狼膽自寒酌君酒與君別寇君難借空鳴咽至
尊垂拱問蒼生但道江南民力竭

江上答客傷王少文

去歲江頭同送客，江水茫茫江月白。
今歲江頭送客歸，問君動定空沾衣。
別去光陰纔一載，可憐世事須臾改。
當日江間折柳人，于今枯骨知何在。
客子聞言雙淚垂，君亡不待余歸時。
訪君不入君華屋，日伴孤猿墳上哭。

七夕曹能始宅上觀妓

涼風吹動黃姑渚，正值牽牛逢帝女。
一年佳會阻星河，數刻交歡罷機杼。
主人留客當今宵，鳴箏少婦紅羅綃。
嬌聲宛轉鸞凰曲，媚眼低回烏鵲橋。
引羽流商歌愈緩。

玉繩漸落明星爛
履墜簪遺樂未休
鐘沉漏盡愁將旦
臨別殷勤贈七襄
秋宵雖短此情長
燭龍已駕扶桑曉
天上人間兩渺茫

建溪逢游宗振

與君神交今十載
彼此飄零隔湖海
擊筑應難逢漸離
鼓刀何處尋朱亥
余也今年過建溪
君方彈鋏居城西
客裏相逢發長嘯
飄飄吐氣凌虹霓
憐君橐中無所有
猶解餘錢去沽酒
肯將蹤跡落紅塵
自許交情同白首

世事悠悠嘆二毛
燈前相對兩絺袍
須臾酒盡東西去
江上潮平月正高

同游宗振陳伯岑集陳季廸齋中

六月溪行苦煩暑
日暮維舟向江渚
乘興行歌訪故人
科頭跣足花間語
花間相對忘主賓
驪呼無異平生親
今朝潦倒齋頭客
明日飄零江海人

西甌道中寄答伯孺病中見送之作

故人卧病空皮骨
精氣銷忘神恍惚
枕上猶於筆硯親

題詩送我游京闕詩來字字皆悲辛半嗟疾病半嗟貧
况兼離別情思惡空令遊子重傷神三疊離歌聲太苦
幾度哀吟淚如雨君方貧病類相如我也飄零同主父
行色匆匆一夢間無由賦別六溪灣空流萬里窮交淚
未識經春衰病顏一別山川成隔越懷人長對天邊月
于今枚叔更何人能向君前談七發

西湖飛來峰歌

我生性愛游名山黃冠布褐常躋攀一丘一壑稍險怪

往往大嘯開心顏此峯幽邃稱奇絕何處飛來忘歲月
自是神靈運化工誰將鬼斧施剗剗山形突兀又玲瓏
懸厓陰洞遙相通紅泉滴瀝歸深澗碧磴岩堯接太空
森羅青壁如屏障窳窳紫紆非一狀岩下時喧萬壑聲
石間盡刻諸天像翠色遙飛九里松白雲長出兩高峯
冷泉露下澄清溜靈隱風高送暮鐘我到山中歇還陟
駭目驚心勞應接奇蹟應誇天下無仙都自與塵凡別
洞門吟眺欲斜暉坐破蒼苔未忍歸幾片寒雲生杖屨

半林微月照僧衣殷勤記取歸時路日暮雲深不知處
由來造化妬神奇只恐飛來又飛去

靈隱寺尋耶溪上人

浮玉山中曾把臂風景依稀如隔世常歎空門無定蹤
此生何處求真諦秋風一棹過錢塘聞說吾師在上方
扶杖入山急相訪靈隱寺中松隱堂方鞋破衲出相見
怪我年來華髮變相逢不作世間言指點前山雲幾片
半榻跏趺雙樹邊笑談隱隱生雲烟論交共結三生約

出世同叅一指禪
新詩別後多如此
總是禪機非綺語
勝地何須論虎溪
高風不用推支許
須臾殘照下雷峰
送客松關第幾重
悠悠此別何時遇
愁聽雲堂薄暮鐘

飲黃白仲安羅館兼東屠緯真使君

主人避客棲空谷
長日柴門稀剝啄
我來欲證大因緣
袖中片刺煩童僕
倉皇倒屣出相迎
青眼相看無世情
狂來叱咤千夫廢
醉後雄談四座驚
吾曹本是玄都客
當日同因酒過謫
行滿何須戀世緣
功成依舊歸仙籍

色相由來非我身凡夫誰識有真人片時結構成爐鼎
一粒玄珠守谷神仙師授我還丹秘逢人豈肯輕開示
能將神氣返虛空自有靈光照天地黃白仲屠緯真斲
時蹤跡落紅塵何時打得虛空碎同出青天駕鶴輪

吳門尋沈從先不遇

當年踏徧吳門路十日尋君不知處年來蹤跡雖相聞
隣人又道移家去閭闔城中多路歧異鄉客子那能知
東尋西訪竟不得惟有殘月相追隨幾迴欲向朱門問

知君不與朱門近，欲向紅塵問故人。
知君寄跡非紅塵，行盡朱門兼白屋。
夜深空作窮途哭，出城昏黑迷歸舟。
滿天風露江干宿。

七夕詞

遙天萬里銀河碧，雙星却笑孤眠客。
玉露金風半夜寒，羅襦繡幕千山隔。
天上人間共此宵，天孫顰近美人遙。
應知樓上蛾眉女，妬殺空中烏鵲橋。

題畫馬扇面贈陳幼謙

真龍產自于闐國促腕高蹄稱汗血顧影驕嘶赤電生
過都歷塊紅塵滅此物何年入漢家番酋作貢過流沙
天開不羨乘黃選內廐寧論白鼻騮扇頭一見生驚詫
貌出權奇更高價已識雄姿勝渥洼况看妙手驚曹霸
吁嗟此馬今豈無安知櫪下非神駒九方不作孫陽死
世上于今只按圖

孝友堂慈竹歌為張穉通賦

主人家在苕溪曲不種奇花種脩竹客來看竹問何名

主人竹下吞聲哭自言此竹生質奇不產終南非嶰谷
物性能同慈母心龍孫愛護知寒燠誰移此竹種庭階
老母當年手自栽已看翠色凌萱草自有清陰覆綠苔
老母辭堂今幾載此竹青青猶未改黃土年來上板輿
紅塵久已生萊綵可憐母逝竹空存見竹還思慈母恩
主人一語一鳴咽座客聞之皆斷魂從今品竹修新譜
不獨湘江有淚痕

題顧長卿小影

郎君年少稱高格髮未勝冠纔覆額同誇秀骨邁凡兒
已有雄文驚座客此日重披舊畫圖神情雖是容華殊
揮毫寫照方童稚轉眼相逢成壯夫悠悠歲月催人老
人生顏色難長好休將青鬢度年華自致雲霄須及早
分得黃金臺送屠田叔轉運使赴京

燕山日落悲風起百尺高臺留故址滿地狐蹤丘隴間
千金馬骨荆榛裏至今行客說燕昭愛士高風久寂寥
侵階碧草空留色翳土黃金已盡銷我家定鼎都燕薊

正是黃金臺上地，萬里星槎上漢來。
諸侯露冕朝天至，臺前賢士集如雲。
拄笏彈冠謁聖君，陽氣自生吹黍谷。
英雄豈說樂將軍，屠君擁傳辭閩海。
自有高才輕郭隗，休歎鹽車上太行。
何須弔古登寒壘，至尊側席正求才。
太室明堂日日開，白璧虞卿先拜賜。
黃金寧用築空臺。

題劉松年溪閣納涼小景

誰家亭館臨溪渚，四面蒼崖夾平楚。
樹色溪聲白晝寒，行天赤日無炎暑。
賓主相看禮數忘，筆牀茗椀對壺香。

圖中清福難消受願借虛亭半日涼

題高漫士晚閣溪雲圖

主人愛溪還愛雲去年走謁武夷君九曲溪流太清泚
千峰雲氣何氤氳幔亭得預曾孫宴歸帶白雲千萬片
天風倏忽下蓬瀛吹散長空成組練漫士何年寫此圖
一溪雲氣長模糊恍疑接筍峰前見還記天游頂上居
一別溪頭峰六六經年不舉看雲目願學宗生作臥遊
畫圖一見心能足

題春山積雨圖

元章不作房山死誰寫雲山縑素裏耳畔如聞滴瀝聲
眼中似見嵐烟起濃雲朦朧樹無根澗水奔流野色昏
竟日風霾渾失晝行人何處辨孤村畫圖如此雖堪惜
莫貯囊中珍十襲只恐時時風雨來生綃一幅淋漓濕
送閔壽卿隱武夷

世人遊武夷往往思卜宅一出清溪謝白雲山靈無計
留雙屐始信人間事可哀幔亭佳宴不重開浮生只愛

紅塵老人世難逃白髮催憐君棄家經幾載服食還丹
顏未改已識仙都註有名尚疑遺蛻函猶在自入閩天
誓不還因緣合在武夷山獨攜一杖千峰裏間放孤舟
九曲間此山元是神仙窟接筍天游雙率律玉女粧殘
峰頂霞金雞叫落灘頭月君今築室此中居永絕塵緣
與世疎回視形骸同糞土能將神氣返空虛我也行年
三十幾半生蹤跡多城市入藥空燒九轉紅著書枉識
關門紫海外徒聞更九州此身期伴赤松遊何時重預

曾孫宴同醉仙人十二樓

送俞本之山人還金昌

滿徑黃花桑落酒送客關門折衰柳涉世空懷失路悲
干時自乏譚天口片刺侯門不得通桂薪玉粒哭途窮
半年逆旅貂裘敝一劍飄然馬首東勸君休下楊朱淚
客裏秋風易憔悴伏枕愁為越國吟吹簫歸向吳門醉
此日諸侯厭布衣可憐窮達世情非君歸莫嘆行裝薄
多少空囊人未歸

憶昔行題友人小像

少年攜手同行樂我甫勝冠君總角歲月悠悠去不還
眼前風景猶如昨此日看君新畫圖神情雖是顏容殊
所嗟童稚尚如此莫怪故人成老夫我也半生甘落魄
君亦胡為戀丘壑高舉猶懷鴻鵠心待時且作龍蛇屈
舊事經今二十秋披圖空感昔時遊與君相見且飲酒
莫遣青銅催白頭

都門送吳允兆還吳興

燕山三月楊柳新別酒一杯送故人故人仗劍意慷慨
仰天大笑辭平津我唱驪駒君駐馬送君半是窮交者
暮角淒涼起驛樓春雲慘淡生原野酒闌歌罷馬頻嘶
千里征途望雲溪獨有王孫歸未得天涯空歎草萋萋

出都門答別鄧汝高負外

十年三上長安道闕下獻書俱不報拂袖還山別故人
風塵滿目傷懷抱長安裘馬多輕肥先達何人憐布衣
惟君慷慨念貧賤交情如此今人稀淒涼舊事那堪數

半榻孤燈寒夜雨，載酒曾同醉錦溪。
看山猶記眠芳墅，轉盼光陰十載餘。
憐余蹤跡仍樵漁，空文何以干明主。
儒術由來生計疎，余也今年三十幾。
依然落魄歸田里，白首何妨老故園。
紅塵從此辭燕市，拔劍哀歌日易昏。
垂楊未折已銷魂，人生離別足感歎。
窮達悠悠何必論，途中感遇效同谷七歌。

吾生本是疎狂客，幾迴落魄長安陌。
棄置應慙骨相屯，壯年自失干時策。
日驅羸馬口微吟，仰天大笑乾坤窄。

嗚呼一歌兮歌慨慷燕山六月飛嚴霜

二歌

歸舟歸舟黃河曲揮汗如漿苦炎燠水淺舟膠不得行
逢人恥作窮途哭高堂慈母念子深倚閭此際枯愁目
嗚呼二歌兮歌慘切仗劍指天天為裂

三歌

有弟有弟俱牛衣家徒四壁常苦饑燕閩相去道路遠
別來一載音書稀知汝日夜望我歸夢魂常遶天涯飛

嗚呼三歌兮歌已短一領征衣淚痕滿

四歌

有姊已老有妹貧平生惟此骨肉親知余流落兼苦辛
家庭悵望應傷神廿年蹤跡半道路平生壯志成灰塵
嗚呼四歌兮歌轉澁猿狖聲哀山鬼泣

五歌

老妻半世空糟糠少婦席未煖君牀男年十五女七歲
去年別我俱恓惶丈夫成名既不早胡然久居天一方

嗚呼五歌兮歌愈急朱顏燈下流黃濕

六歌

有朋有朋多窮交平生風誼如同胞揚雲拓落衆所棄
數子不敢輕相嘲此日飄零勿復道與君矢志甘衡茅
嗚呼六歌兮歌且緩伐木聲殘腸欲斷

七歌

擾攘烽烟何太急四海紛紛飛羽檄但見縱橫戎馬多
何處哀鳴鴻雁集書生徒抱杞人憂中宵起舞空悲泣

嗚呼七歌兮歌已終黃昏曠野淒寒風

彭城行

彭城半遶黃河水楚宮歲久生荆杞殺氣清秋暗戰場
愁雲白日低殘壘楚漢當年幾戰爭啞叱咤悲風生
楚兵一夕盡歸漢帳前健兒皆楚聲烏騅不逝虞姬死
垓下歌聲成變徵百二關河屬漢家八千子弟徒為爾
霸圖百戰總成灰弔古還勞過客哀千載沐猴成一笑
年深戲馬留空臺黃河日夜東流去荒城寥落悲狐兔

世事興亡一瞬間英雄枯骨餘丘墓休將楚漢論雌雄
此地曾聞唱大風試向咸陽城上望離離衰草滿新豐

黃節婦復明歌

黃氏母夫亡守志多辛楚血淚洒黃泉淚枯雙目瞽母
目瞽兒心苦朝夕吮眸眸未愈母子精誠良可哀一朝
忽爾雙眸開母目開父目瞑老淚依然滴孤枕

分得九疑山送屠田叔守辰州

楚都山水稱奇險突出高峰青九點天外巫黔路渺漫

峰陰谿澗流深淺峰峰相間色參差無數青螺鏡裏窺
變幻烟霞看莫辨滿天雲雨望堪疑重華當日巡南服
駐蹕蒼梧窮地軸一夕龍髯上鼎湖數聲鸞吹傳空谷
鸞吹龍髯去不還湘江帝子慘朱顏愁眉久鎖鋒前黛
血淚長留竹上斑山色含顰望巡狩時時似聽簫韶奏
飛瀑寒流到處奇丹崖朱洞天然秀瀟湘烟月洞庭雲
遠岫聯綿一帶分鷓鴣夜叫黃陵廟狐兔秋悲虞帝墳
古蹟荒涼不堪語果有啼烟兼嘯雨使君剖竹向荆門

正近瀟湘洞庭浦有時行部擁雙旌定弔娥皇與女英
風前好薦瓊芳把月下如聞環珮聲九疑峰影何重疊
峰下褰帷勞應接懷古寧辭駐一麾搜奇不惜停雙屐
搖搖桂櫂楚江濱嫋嫋秋風木葉聞遺我不須褰杜若
騷成只待寄湘君

題盛行之畫梅卷

盛君畫梅太奇絕老幹如龍更如鐵筆底幽魂冷不徹
滿紙枯株三大雪六月披圖身欲僵一堂坐客皆聞香

就中先輩多評章佳者長沙之李

東陽

華亭張駿當時

此物果誰有楊公成玉揚州守公也珍之若瓊玖自謂
此圖傳不朽子孫棄之同敝帚百年竟落他人手峽水
林君偶得之不惟愛梅魚愛詩猶記當初兵火時居民
鼠竄家流離書籍圖畫焚無遺此圖藏之高樹枝倭奴
雖點那能知淫雨沾濕寒風吹鬼神呵護無損虧吁嗟
此圖亦已奇付與妙手重裝池千秋萬歲無離披千秋
萬歲無離披

題薛晦叔小像

誰將縑素開生面，神骨如冰目如電。
童烏文藻自堪誇，洗馬風流今再見。
畫史揮毫未入神，十分纔得幾分真。
有時鶴氅行微雪，人比丹青更出塵。

題陳仕卿蕉雨亭

虛亭四面芭蕉綠，疎雨瀟瀟聽斷續。
幾點啼殘屋上鳩，數聲滴破隍中鹿。
洗盡紅塵翠色寒，美人含淚倚朱闌。
題詩好趁初晴後，醉墨淋漓濕未乾。

題朱竹

根如赭虬髯葉如丹鳳尾有時截作釣鰲竿珊瑚亂拂
桃花水有時擲杖化為龍白日青天赤鱗起能將紅霧
變蒼烟產在朱明幾洞天須臾絳節生彤管只向松間
滴露研

陳伯孺兄弟水明樓春宵聽雨歌

我家有齋名綠玉齋前種得千竿竹君家亦有水明樓
半畝方塘山影流君頻訪我鰲山麓我每尋君溪水曲

與君來往十年餘到此樓中幾迴宿今春買棹來相尋
峽江風起波濤深樓中賓主黯相對四山陰翳生淫霖
簷前坐聽聲聲雨聊把琴書供笑語燭盡猶然興未闌
詩成自覺心相許瀟瀟風雨莫深愁百尺樓中且暫留
憑君貌出巴山夜一幅丹青當卧遊

霞林樵隱為梁逸人賦

山中一道明霞起照得林巒色俱散初疑晴彩結為帷
還訝餘光散成綺林間彷彿見高標白日青天掛絳綃

梁君霞外神仙客時向山中稱隱樵斧柯來往壺公谷
伐得晴霞成幾束曉起常依洞裏行夜深祇傍岩邊宿
擔頭挑得赤城歸却似桃花片片飛斫來自足山家業
服處真成隱者衣殷紅滿目看如絢朝暮陰晴千萬變
此物由來高可食願向深林求一片

美人買鐵馬歌和幼孺

瑤宮僊子遺環珮百結流蘇向空墜半天亂逐片雲飛
無數琅玕一時碎趙壁隋珠半已殘重將彩線串團圓

良工持向街頭賣臨風忽聽聲珊珊送入妖嬌耳
玉笋提攜心暗喜探得青蚨出錦囊買來挂在雕簷底
一陣微風一陣聲美人含笑聞琮琤飄揚祇益春心動
淒切翻令午夢驚銅壺夜靜催銀箭留得檀郎宿深院
却愛隣姬睡乍酣玎璫莫向空中戰

題陳伯孺效漫士山水小景


龍門待詔高廷禮興到揮毫寫山水點淡峰巒朦朧雲
一生學得南宮體三絕聲名重昔時畫成題詠墨淋漓

總緣人品壓流輩以茲并重無聲詩流傳歲久蟲魚蝕
半尺冰綃難論值龍門去後墨池乾畫史誰能繼其跡
陳子灣溪我輩人應疑待詔是前身一時詞翰推雙美
點染雲山更有神滿目烟霞濃復淡複嶺重岡連斷岸
偏于米老得風神難與龍門辨真贗歲月驚看忽十年
燈前隱隱生雲烟詩成戲筆題其上留作人間寶墨傳

題馬遠山水

幽人野性耽空谷一簇葵花數竿竹磐石嶮崎出澗阿

流泉湍激交林麓清宵露坐月光遲稚子支筇背後隨
林下水邊無俗物既堪圖畫又堪詩



漫亭集卷三